

无忌与真文辉之属论谏诤则有孟春维柏士晋之属论忠义则有欢与腾蛟天衢之属遥遥华胄何一不可为后人师俾族中之俊秀抗心希古以媲美于莆中二蔡唐之马璘而为何氏光焉夫抑可以起颓风而厉末俗也已时岁丙辰孟秋之月

前清中书科中书銜候选教谕廩贡生邑人谢鹤年序

五修重录

六修又录

四修谱序二

天地之气运寒暑往来四时递嬗流行而不衰人之在天地也初本乎祖祚锡千百载之遥罗布千百里之远经兵燹而不穷更朝代而不替继继绳绳相续弗绝亦有似夫二气之斡旋者我何氏系出庐江颇称遥遥华胄前人之述备矣无庸赘惟自前明洪武间 元善公由选举官宝郡教授遂卜居于附郭之首邑邵阳其初行踪落落聊为栖身计耳寝假而孙枝蕃育户口日多派别支分散居宁乡益阳安化湘乡等处者合计一万有奇猗欤铄哉瓜瓞绵长椒聊衍实葩经所咏诚有之矣虽然人多则情

易疏代远则源易失若非考世系详坟墓编辑成书势不至尊卑失序颠末混淆不已奚怪乎同宗莫识苏子讥为途人坟墓无稽汾阳致误拜也然则谱之修不綦重哉夫谱者普也普遍而无私也抑补也补漏而无遗也予族谱帙创修于前清乾隆乙巳（1786□ 再修于咸丰戊午

（1858□ 三修于光绪己丑（1889□ 迄今人世殊忽忽

垂三十载生齿益繁难免鳏渎夫莫为之前虽美弗彰莫为之后虽盛弗传况乎国家多难时局沧桑孝子仁人尤当加意续修诚宜急矣岁甲寅族莫诸公毅然提倡而分居各郡各邑者亦麇然同志踊跃从公越两载而事竣虽出当事之迈往顾非 先灵之默为呵护不至此披览其书式仿柳欧详其居址履历若天之星辰有经有纬也辨其昭穆亲疏若地之江河有源有委也又若乾坤六子少长有序也天也地也人也名为三才实属一体殆隐相通而不悖也岳崇更有说焉吾祖教授公肇基严塘燕翼长垂历时五百余年衍派二十余代眷顾其子孙者固同天无私覆地无私载也而后之宏绍述图光大者宜法天道之不已地道之无亏以似以续敬其所尊爱其所亲为肖子为慈孙奋乎百世之上百世之下丕振箕裘扬芬史乘